

HARBIY PEDAGOGNING KASBIY KOMPETENTLIGINING MAZMUN-MOHIYATI

Shomurotov Zoxid Zakirovich

dotsent, podpolkovnik O'R QK Akademiyasi katta o'qituvchisi

Tel: +998909577023

Annatatsiya: Ushbu maqolada harbiy pedagoglarning kasbiy komretentliginig mazmun-mohiyati, tarkibiy qismlari hamda unga qo'yilgan sifat talalari keng mazmunda yoritilgan.

Kalit so'zlar: Vatan, Harbiy pedagog, bilim, komretentlik, kompetensiya, kreativ, tингlovchi, jamoa, ta'lif, konsultatsiya, muassasa.

Hozirgi davrdagi jamiyat taraqqiyoti jarayonlari barcha sohalarga, shu jumladan, kadrlar tayyorlashga ham yuksak talablar qo'yemoqda. Ayniqsa, jahon miqyosidagi harbiy-siyosiy vaziyat o'zgarib, dunyoning turli mintaqalarida tashvishli va xavotirli mojaro va to'qnashuvlar sodir bo'lib turgan paytda Vatanimiz mustaqilligini, yurtimiz tinchligini mustahkam himoya qilishga qodir yuqori malakali harbiy kadrlarni tayyorlashga qo'yilayotgan talablar oshib bormoqda.

O'zbekiston Respublikasi Prezidenti, Qurolli Kuchlar Oliy Bosh Qo'mondoni Sh. Mirziyoyev xavfsizlik kengashining kengaytirilgan tarkibdagi yig'ilishida so'zlagan nutqida harbiy kadrlarni tayyorlash masalasiga alohida e'tibor qaratib, kadrlar bilan ishlash, ularni tayyorlash va malakasini oshirish bo'yicha samarali tizim faoliyatini ta'minlash, boy amaliy tajribaga ega bo'lgan harbiy xizmatchilar va xodimlar orasidan eng munosib shaxslarni o'qituvchilik faoliyati uchun tanlab olish bo'yicha samarali tizimni joriy etish lozimligini, yosh kadrlarni tayyorlashda o'qituvchilarning o'z salohiyatini yanada to'liq safarbar etish zarurligini ta'kidlab o'tdilar [1].

Ko'rsatilgan dasturiy vazifalarini amalgalashda harbiy ta'lif jarayonining samaradorligini ta'minlash, harbiy ta'lif muassasalari bitiruvchilarining kasbiy tayyorgarlik darajasini yangi sifat darajasiga ko'tarish lozim.

Bunda pedagog kadrlarning kasbiy salohiyati, mahorati hal qiluvchi ahamiyatga ega.

Hozirgi harbiy ta'lif tizimi qanchalik yangi, zamonaviy o'quv-moddiy bazasiga, qurol-yarog' va jangovar texnikaga ega bo'lmasin, axborot-kommunikatsiya texnologiyalari, trenajyorlar bilan ta'minlanmasin, inson omili, pedagogning o'rni beqiyosligiga shubha yo'q.

Shu bois hozirgi davrda ta'lif samaradorligini oshirish, harbiy pedagog kadrlarning kasbiy kompetentligi va kreativligi darajasini rivojlantirish, innovasion faoliyatga yo'naltirish, harbiy ta'lif muassasalaridagi o'quv jarayoniga innovasion

ta’lim va axborot kommunikasiya texnologiyalarini tatbiq etish, ilg‘or xorijiy tajribalarni o‘rganish va maqsadli o‘zlashtirish harbiy mutaxassislarini tayyorlash jarayonining dolzarb vazifalari sifatida belgilanadi.

So‘nggi yillarda pedagogika faniga “kompetentlik”, “kompetensiya”, “kompetentli yondashuv” tushunchalari keng kirib kelmoqda. Biroq, bunga qaramay, manbalarda, ayniqsa, o‘zbek pedagogik adabiyotlarida bu tushunchalarga yetarlicha va aniq urg‘u berilmagan, ba’zi hollarda esa “kompetentlik” va “kompetensiya” tushunchalarini qo‘llashda chalkashlikka yo‘l qo‘yilmoqda.

S.I. Ojegovning lug‘atida “kompetentlik” – “ma’lum bir sohani bilish, xabardorlik, obro‘ga ega bo‘lish”, “kompetensiya” esa “biror bir kishining, tashkilotning vakolatlari, huquqlari, kimningdir ixtiyorida bo‘lgan masalalar, ishlar doirasi” (tarjima muallifniki) sifatida ta’riflanadi.

O‘zbek tilining izohli lug‘atida “kompetensiya” atamasiga “Muayyan organ yoki mansabdor shaxsning rasmiy hujjalarda belgilangan vakolatlari doirasi – vakolat” va “Shaxsning biror-bir sohadan xabardorlik, shu sohani bilish darajasi” deb ta’rif berilgan. Pedagogik atamalar lug‘atida esa “kompetensiya – u yoki bu soha bo‘yicha bilimdonlik” deya ta’riflanadi.

So‘ngi yillarda turli sohalarda bo‘lgani kabi, pedagogik tadqiqotlarda ham pedagogik faoliyat nuqtai nazaridan kelib chiqib, o‘qituvchining kasbiy kompetentligi masalasini kengroq o‘rganishga e’tibor qaratila boshlandi. Jumladan, I.S. Sergeyev “kompetensiya – bilim + malaka + tajriba birligini aks ettiradi.

Bu nazariy bilimlar va amaliy tajriba asosida hayot va faoliyatning turli sohalarida amaliy vazifalarni hal qila olish qobiliyati” deb ko‘rsatadi. N. Muslimov va M. Urazovalar o‘qituvchining kasbiy kompetentligini shakllantirishning yuqori darajasiga erishishda innovatsion pedagogik shart-sharoitlarning muhimligini ko‘rsatib o‘tadilar. A.A. Shayusupova va S.R. Kamalova mavjud tadqiqotlarni tahlil qilgan holda kompetentlikning o‘zini tutish, texnik (professional), umumiyl, maxsus, boshlang‘ich, ijrochi va differensial turlarini ajratadilar. D.Sh. Barotova o‘zining tadqiqot ishini pedagogning psixologik kompetentligi masalasini o‘rganishga bag‘ishlagan.

Yuqorida keltirilgan ta’riflarni umumlashtirgan holda harbiy ta’lim jarayoniga tatbiq etib, “kompetentlik”ni quyidagicha talqin qilish mumkin: “Kompetentlik – mansabdor shaxs (o‘qituvchi, komandir, boshliq, yo‘riqchi)ning shaxsiy imkoniyatlari, uning o‘zida mavjud bilim, malakalar, ko‘nikmalar hamda harbiy xizmat va hayot tajribasi yordamida harbiy mutaxassisni – Vatan himoyachisini tayyorlash vazifasini hal qilish bilan bog‘liq masalalarni ishlab chiqishga imkon beruvchi malakasi”.

Kompetentli shaxs kasbiy faoliyatining mohiyatini tashkil etuvchi funksional vazifalarni samarali amalga oshirishiga imkon beruvchi bilimlar, malakalar,

qobiliyatlar va shaxsiy sifatlarning tizimli namoyon bo‘lishida, uning bilimdonligi, dunyoqarashining kengligi, obro‘sni va shu kabilarda namoyon bo‘ladi.

Ofitserning pedagogik kompetentligi deganda esa, uning qabul qilingan me’yorlar, standartlar va talablarga muvofiq pedagogik funksiyalarni bajarishga tayyorligi va qodirligini belgilovchi professional-shaxsiy xususiyatlari tushuniladi.

Professional-pedagogik kompetentlik pedagogik vogelikni izchil idrok etish va unga izchil ta’sir ko‘rsatish ko‘nikmalarini o‘z ichiga oladi.

Kompetentli o‘qituvchi – bu kasbiy bilim, ko‘nikma va malakalarni egallagan, nafaqat o‘z faoliyatini loyihalashtira oladigan, balki pedagogik jarayonni boshqarishda undagi har qanday o‘zgarishlarni sezishga qodir mutaxassisdir [2].

Pedagogik jarayonni amalga oshirishga nazariy va amaliy jihatdan tayyorlik, ya’ni, kompetentlik harbiy pedagogning professionalligi darajasini ko‘rsatadi.

Kompetentli harbiy pedagog quyidagilarga qodir bo‘lishi lozim:

harbiy mutaxassisiga qo‘yiladigan zamonaviy talablarni yaxshi bilishi va kasbiy yutuq pillapoyasidan muvaffaqiyatli harakat qilishi uchun tinglovchiga qanday bilim, ko‘nikma va malakalar kerak bo‘lishini tushunishi hamda tushuntira olishi;

tinglovchilarining haqiqiy hayotiy va kasbiy qiziqishlarini ko‘ra olishi va tushunishi;

tinglovchilarga, ularning fikrlari, savollari va qiziqishlariga hurmat bildirishi;

yuzaga kelgan ta’lim-tarbiya yoki hayotiy muammoli vaziyatlarning kelib chiqishi sabablarini tushunishi, tahlil qilishi va hal qilish yo‘llarini topa bilishi;

o‘rganilayotgan o‘quv materialini kundalik hayot va xizmat bilan, tinglovchilarining qiziqishlari va oldiga qo‘ygan maqsadlari bilan bog‘lay olishi;

o‘zining va tinglovchilarining bilimi, ko‘nikmalari va malakalarini o‘qish va o‘qishdan tashqari amaliyotda mustahkamlashi;

o‘quv mashg‘ulotlarini rejalashtirishda ta’limning turli shakl va metodlarining keng imkoniyatlaridan foydalana olishi;

o‘quv mashg‘ulotlarini o‘tishda ta’limning an’anaviy shakl va metodlari bilan bir qatorda innovatsion pedagogik texnologiyalarni ijodiy va samarali qo‘llay olishi;

ta’lim jarayonida aniq maqsadlarni ko‘zda tutishi va ularga erishilganlik darajasini tinglovchilar bilan birgalikda baholay olishi;

“muvaqqiyatga erishish vaziyatini yaratish” metodini puxta egallashi;

tinglovchilardagi mavjud tajribaga tayangan holda vaqtidan va mavjud imkoniyatlardan samarali foydalanib yangi tajriba hosil qilish;

o‘zi yetarli kompetentlikka ega bo‘lmagan masalalarni muhokama qilish uchun ekspert va mutaxassislarni jalb qila olishi;

tinglovchilarining yutuqlarini nafaqat baho qo‘yish bilan, balki, mazmunli tavsiflash yordamida ham baholay olishi;

tinglovchining nafaqat fandagi yutuqlarini, balki shaxsiy sifatlaridagi rivojlanishni ham baholay olishi;

tinglovchilarning nafaqat bilimidagi, balki jamiyatda yashashga tayyorligidagi kamchiliklar va muammolarni ham ko‘ra bilishi;

o‘zining hayotiy muammolarini tashabbus, mustaqillik va mas’uliyat ko‘rsatgan holda hal eta olishi va h.k.

Harbiy ta’lim jarayonini tashkil etish va amalga oshirishda pedagogik kompetentligining asosiy tarkibiy qismlari quyidagilardan iborat bo‘ladi:

Ta’limiy kompetentlik - harbiy ta’lim jarayonini tashkil eta olish va faoliyatidagi o‘z harakatlari algoritmini belgilay olish;

ta’lim va mustaqil ta’lim (o‘ziga-o‘zi ta’lim berishi) bilan bog‘liq masalalarni hal eta olish;

bilimlarning alohida tarkibiy qismlarini ajratish va ularni umumlashtira olish;

o‘zining va boshqalarning ta’limiy tajribasidan kerakli foyda ola bilish;

berayotgan ta’limi natijasi uchun o‘z zimmasiga mas’uliyat ola bilish.

Tadqiqiy kompetentlik-axborot ola bilish va ularni tahlil qila olish;

axborot va materiallar olish uchun turli manbalarga murojaat qila olish va ulardan foydalanish;

konsultatsiya (maslahat) olish va berishni tashkil eta olish;

turli xildagi materiallarni turli auditoriyalarga taqdim eta olish va muhokama qila bilish;

mustaqil faoliyatda hujjatlar va materiallarni qo‘llay olish va tizimlashtirish.

Ijtimoiy-psixologik kompetentlik-jamiyat va fan taraqqiyotining ma’lum bir jihatlariga tanqidiy nazar sola olish;

sodir bo‘layotgan va bo‘lib o‘tgan voqeа-hodisalar o‘rtasidagi bog‘liqlikni ko‘ra bilish;

ta’limiy va kasbiy hodisalarning siyosiy va iqtisodiy mohiyatlarining muhimligini tushunish;

ijtimoiy holat, sog‘liq, atrof muhit va boshqalarni ob’ektiv baholay olish;

san’at asarlari va adabiyotni tushunish.

Kasbiy-kommunikativ kompetentlik - boshqalarning qarashlari, nuqtai nazarlarini tinglay olish va qabul qila bilish;

bir necha tillarni bilish, tushunish, gapirish va yozish;

omma (auditoriya) oldida so‘zlay olish;

bahslashish va o‘z nuqtai nazarini himoya qila olish;

ma’lumotlar berilgan grafiklar, diagrammalar va jadvallarni o‘qiy olish;

samarali psixologik-pedagogik muloqotni tashkil eta olish va amalga oshirish.

Harbiy-kasbiy kompetentlik harbiy fanlardan chuqur bilim, ko‘nikma va malakalarga ega bo‘lish;

kasb-lavozim tayyorgarligi dasturini to‘liq o‘zlashtirish;

dunyodagi va mintaqadagi harbiy-siyosiy vaziyatni bilish, tushunish va tahlil qilish;

mutaxassislarning ta’lim jarayonini jangovar tayyorgarlik dasturlari va vazifalari bilan bog‘lay olish;

ta’lim jarayoni natijalarining amaliy ahamiyatini ko‘rsata olish;

pedagogik jarayon vaqtida va kundalik hayotda qat’iy harbiy intizomga rioya qilish hamda umumharbiy nizomlarga xos o‘zaro munosabatlar o‘rnatish borasida shaxsiy ibrat ko‘rsatish.

Hamkorlik kompetentligi-tezkor va to‘g‘ri qaror qabul qila olish;

mashg‘ulotlar va harbiy xizmat jarayonida maqsadga muvofiq pedagogik aloqa o‘rnata olish;

pedagogik jarayonda yuzaga keladigan turli fikrlar va konfliktlar mohiyatini tushuna olish;

muzokara olib borish va pedagogik jarayon ishtirokchilarini muammo muhokamasiga jalb eta olish;

pedagogik vazifalarni hal etishda jarayon ishtirokchilari bilan hamkorlik qila olish va jamoada ishlay olish.

Tashkilotchilik kompetentligi-o‘z ishi va faoliyatini to‘g‘ri tashkil eta olish;

o‘z zimmasiga mas’uliyat ola bilish;

faoliyat va jarayonlarni modellashtira olish;

guruh yoki jamoa tarkibida ishlay olish va umumiy faoliyatga hissa qo‘shish;

pedagogik jarayonni loyihalash, tashkil etish va amalga oshirish.

Aytilganlardan tashqari, pedagog uchun fan bo‘yicha kompetentlik, umumpedagogik kasbiy kompetentlik, boshqaruvchanlik kompetentligi, refleksiv kompetentlik, axborot-kommunikativ kompetentlik, innovasion faoliyat kompetentligi, kreativ kompetentlik ham muhim sanaladi hamda ular birgalikda o‘qituvchining yuksak mahorat cho‘qqisini egallashlariga asos bo‘lib xizmat qiladi [3].

Xulosa qilib aytish mumkinki, harbiy pedagogning kasbiy kompetentligi yuqori malakali harbiy mutaxassis tayyorlashda muhim omil sanaladi.

Har bir pedagog o‘zining harbiy-kasbiy va pedagogik mahoratini rivojlantirib borishga, ijodiy individualligini shakillantirish ishiga dinamik jarayon sifatida qarab, doimiy ravishda o‘zining kasbiy takomillashuvi ustida ishlashi talab etiladi.

Foydalangan adabiyotlar:

1. Mirziyoyev Sh.M. Qurolli Kuchlarimiz – mamlakatimiz barqarorligi va taraqqiyotining mustahkam kafolatidir / O‘zbekiston Respublikasi xavfsizlik

kengashining kengaytirilgan tarkibdagi yig‘ilishdagi nutqi // Vatanparvar, 2018-yil, 13-yanvar.

2. Muslimov N. A., Usmonboeva M.H., Sayfurov D. M., To‘raev A. B. Pedagogik kompetentlik va kreativlik asoslari /. — Toshkent, 2015. — 120 b.
3. Satib-Aldiev A.A., Harbiy pedagogning kasbiy kompetentligi. Oquv qo‘llanma. O‘R QK Akademiyasi.- Toshkent 2023-yil. 75-bet.
4. Muslimov.N.A. Harbiy ta’lim o’qituvchisini kasbiy shakllantirishning nazariy-metodik asoslari. // Pedagogika fanlari doktorlik dissertatsiyasi. T.: 2007
5. Tolibov N.N., Bo‘lajak uchuvchi-muhandislarni kasbiy kompetentligini rivojlantirish metodikasini takomillashtirish. // avtoref. diss. dok. (PhD). Ped. fan.- Toshkent 2021.

Internet saytlari

6. www.tdpu.uz
7. www.pedagog.uz
8. www.edu.uz
9. <http://www.ziyonet.uz>